









WLR
5467



I

ARREST DE LA COVR
de Parlement de Thoulouse,
du Sabmedy 7. de Febu. 1615.
les Chambres assembleez.

*Par lequel, entre autres choses, est
ordonné qu'à la requeste du Pro-
cureur general du Roy, il sera en-
quis des Vœus preiudiciables à
l'Estat, qui se font sous pretexte
de Religion, par aucuns Pre-
stres, & autres.*

ENTRE le Procureur general du
Roy, demandeur en repara-
tion de contrauentions faites aux
Arrests & ordōnances de la Cour,
rebellion & desobeissance d'une
part; & M. Guillaume de Resse-
guier Conseiller du Roy, & Pre-
sident en la seconde chambre des

Enquestes d'icelle, Anthoine la Saluanie, Mathieu Lardos, & Alexandre Monthus Prestres, defendeurs, d'autre: Veu le procès charges & informations; Procès verbal des Commissaires à ce deputez, Auditions & Responces desdits de Resseguier, La Saluanie, Lardos & Monthus, dire & Conclusions du Procureur general du Roy; DIT A ESTE, que la Cour, les chambres assembleez, a ordonné & ordonne que remonstrances seront faictes audict de Resseguier sur lesdite contraventions par luy faites aux Arrests & ordonnances d'icelle: Et pour les causes resultants du procès, à suspendu & suspend ledict Resseguier de l'exercice de son estat & office de Conseiller &

President ausdites Enquestes & entree du Palais par le temps & espace de six mois: Et en outre luy a fait & fait inhibitions & defences de s'entremettre par cy-apres *du spirituel Et temporel* de la maison des filles dites du tiers Ordre de S. François, *directement ne indirectement*, sur peine de privation de fondit Estat & office de Conseiller & President: Si a enjoint & enjoint audit de Resseguier & Prestres establis en la maison proche de l'habitation desdites filles, vuider icelle; Et à l'Archevesque dudit Thoulouse, ou à son Vicaire general de pourueoir de quelque fille religieuse d'aage competent pour la conduite & direction desdites filles; Et icelles faire voiler & closturer

dans deux mois pour toutes pre-
fixions & delais; autrement y sera
par la Cour pourueu, ainsi qu'il
appartient: Et a condamné &
condamne lesdits de Saluanie,
Monthus & Lardos, & chascun
d'eux en cent sols d'amande à l'or-
donnance de ladite Cour, pour la
desobeissance par eux faite resul-
tant dudit procès verbal: Neant-
moins a ordonné & ordonne qu'à
la requeste dudit Procureur ge-
neral du Roy *sera enquis des vœus*
extraordinaires & preiudiciables à
l'Estat, qui se font sous pretexte de
Religion par aucuns Prestres & au-
tres, luy permettant à ces fins fai-
re publier monitoire general en
forme de droict.

5

VOEV FAICT
PAR I. FERRAIGE
A M. G. DE RESSEGVIER.

Je foubigné, constitué & establi en la presence de Dieu eternal, & de toute la Cour celeste, ayant consideré l'immense bonté de Dieu en ses benefices, sa clemence & misericorde en mes pechez, ses dons & faueurs en ses inspirations, ce jourd'huy 20. d'Aoust 1611. feste de S. Bernard, heure de dix, en l'Eglise des religieuses du tiers ordre de saint François, vouë vœu d'obeissance à Dieu & à la vierge Marie mere de Dieu, S. Pierre, S. Paul, & tous les Saints & Saintes de Paradis, me confiant en la misericorde de Dieu, aux prieres de la Sainte vierge Marie, & de tous les

Saincts & Sainctes, pour ma vie,
 irreuocablement, comprenant
 en soy *vœu de chasteté & pauvreté,*
proportionnée à l'Estat Apostolique
de Prestre Seculier, & tout selon la
 volonté de celuy à qui ie desire
 me soubsmettre pour l'amour de
 Dieu, qui estes vous mon reue-
 rend pere *Monsieur de Resseguier*
President en la Cour de Thoulouse,
 vous donnant plain pouuoir d'e-
 xiger ledit vœu par toutes voyes
de Justice temporelle ou spirituelle, ne
 me reseruant que le seul desir de
 vous obeir comme vous pleust
 me promettre de me comman-
 der : et au cas que decederiez
 plustost que moy, vous pourriez
 me laisser obeissant & soubsmis à
 tel que le sainct Esprit vous in-
 spirera, ma volonté estant telle

que ie la consacre, oblige & dedie
à ces fins, elle mesme premiere-
ment & mon esprit avec toutes
ses facultez, mon ame avec tou-
tes ses puissances, mon cœur avec
toutes ses affectiōs, *mon corps avec*
tous ses sens, & tout, vt hostiam vi-
uentem: Ouy ie m'oblige & me
soubsmets selon la volonté de
vous, mon reuerend pere, en la
presence de mon Dieu, & à la
veüe de l'Eglise triomphante, &
en la face de l'Eglise militante ma-
treschere mere: Ouy & le signe
volontairement, irreuocable-
ment & ioyeusement, apres auoir
prié à mon Dieu eternal, tout
puissant & tout bon Pere, Fils, &
sainct Esprit, de vouloir confir-
mer en moy ce vœu, & accepter
ce mien sacrifice cordial & inte-

rieur en odeur de suauité, & comme il luy a pleu me donner l'inspiration & volonté de le faire, qu'il me donne aussi la force & grace requise pour l'accomplir & le rendre à Dieu, qui estes mon Dieu, mon amour & mon createur, que ie vous adore, ie vous benis & vous louë, criant, Viue Iesus, & me signe.

I. Ferraige.











